

Budget Reaction

वित्त मंत्री निर्मला सीतारमण हुंदे आस्सेआ पेश कीते गेदे 2025-26 दे केन्द्रीय बजट गी जम्मू कश्मीर च बड़ा मता सराहया जा'रदा ऐ। जम्मू कश्मीर दे लोकें इस बजट गी आसे मेदे आला बजट आखेआ ऐ की जे एह्दे च आम लोकें, रोजगार, बुनियादी ढांचे, निर्यात ते सैलसफा पर ध्यान केन्द्रित कीता गेआ ऐ। खजाना मंत्री हुंदे आस्सेआ कीते गेदे ऐलान मूजब 12 लख रपे तगर दी औदन पर हुन टैक्स नेई देना होग। इस फैसले दा आम लोकें बड़ा मता सुआगत कीता ऐ। इस तब्दीली कन्नै मिडल क्लास दे लोकें गी बड़ा मता फायदा होग, एह्दे कन्नै उनेंगी टैक्स भरने दे बोझ ते निवेश च बी बाद्धा होग।

<><><><><><>

JK Budget

केन्द्र सरकारै अगले माली ब'रे 2025-26 दे बजट च केन्द्र शासत प्रदेश जम्मू कश्मीर लेई 41 ज्हार करोड़ 7 लख रपे दा प्रस्ताह रखेआ ऐ। इस प्रस्तावित राशि थमां 40 ज्हार 619 करोड़ 3. लख रपे संसाधने दी वित्थ गी पूरने लेई जम्मू कश्मीर गी केन्द्रीय सहायता दे तौर पर दित्ते जाने लेई रखे गे न। बजट सरबन्धी दस्तावेज मूजब 2 सौ 79 करोड़ रपे आपदा प्रतिक्रिया कोष लेई ते इक सौ इक करोड़ 71 लख रपे ढांचागत परियोजनाएं लेई दित्ते गे न। एह्दे अलावा केन्द्र सरकार नै 9 ज्हार 325 करोड़ रपे जम्मू कश्मीर पुलस लेई अलाट कीते न। बजट तैहत पुलस बल दे पूंजीगत खर्च लेई राशि दित्ती गई ऐ। 8 ज्हार 897 करोड़ 72 लख रपे रोजमर्रा दे खर्च लेई ते 4 सौ 28 करोड़ ते इक लख रपे महत्वपूर्ण परियोजनाएं लेई रखे गे न।

<><><><><><>

Annoncement

केन्द्री बजट 2025-26 बारे आकाशवाणी दा क्षेत्रीय समाचार एकांश जम्मू अज्ज ऐतवारें इक विशेष परिचर्चा प्रसारत करोग। 45एं मिंटे दा एह् परिचर्चा अज्ज रातीं 8 बजे साढ़े प्राइमरी

चैनल पर प्रसारित कीती जाग जेहड़ा तुस मीडियम वेव 303 मीटर यानि 990 किलोहर्ट्स एफएम 100.3 मैगाहर्ट्स ते डीआरएम 981 किलोहर्ट्स पर सुनदे हो। इस परिचर्चा च समाज दे बक्ख-बक्ख वर्ग कन्नै तालुक रखने आले माहिर बजट दे बक्ख-बक्ख पैहलुएं पर चर्चा करगन।

<><><><><><>

Dy CM

उपमुख्यमंत्री सुरिंदर चौधरी होरें आखेआ ऐ जे ओमर अब्दुल्ला हुंदी अगुवाई आहली सरकार जम्मू-कश्मीर दे पूरे-पराते विकास लेई वचनबद्ध ऐ। उनें आखेआ जे प्रदेश च छड़े प्रोत्साहनें आस्तै गै उद्योग स्थापित नेई कीते जाडन सगुआं इंदा मकसद मुकामी लोकें लेई रोजगार पैदा करना होना लोड़चदा ऐ। उनें इब्बी जकीन दोआया जे गैर-कनूनी तौरा पर खान्ना कड्डने आहलें, नशा तस्करें ते गैर-कनूनी गतिविधिएं च मुलव्वस लोकें खलाफ सख्त कार्रवाई कीती जाहग। सुरिंदर चौधरी होरें गलाया जे सरकारै समाज दे सब्बनें तबकें लेई तरक्की ते कम्में च पारदर्शिता जकीनी बनाने दा पक्का धेइया कीते दा ऐ।

<><><><><><>

PRS Deadline

जम्मू-कश्मीर सरकार नै अपने मलाजमें लेई उंदी संपत्तिएं मतल्लक सलाना रिटर्न पीआरएस पोर्टल उप्पर जमा करोआने दी खीरी तरीक बधाइयै 15 फरवरी 2025 करी दित्ती ऐ। पैहले एह समें-सीमा 31 जनवरी तगर दी रक्खी गेदी ही पर केई सारे मुलाजम, इस समें-सीमा दे अंदर एह रिटर्न जमा नेई करोआई सके जेहदे चलदे इसी बधाने दा फैसला लैता गेआ ऐ। सरकारै इब्बी आखेआ इस हुक्मै दी पालमा नेई करने ते तय समें-सीमा दे अंदर-अंदर एह रिटर्न जमा नेई करोआने आहलें खलाफ कार्रवाई कीती जाहग जेहदे च भ्रष्टाचार दी रोकथाम सरबंधी कानून तैहत जुर्माने लाना ते विजिलेंस क्लीयरेंस नेई दित्ता जाना बी शामिल होग। ओकड़े मुलाजम, जिनें'गी अपनी संपत्तिएं मतल्लक सलाना रिटर्न भरने च कोई बी दिक्कत पेश औंदी ऐ उनें'गी एह सलाह दित्ती गई ऐ जे ओह अपने संपर्क ब्यौरें गी अपडेट करन ते अधिकारिक ईमेल support-prs@jk.gov.in उप्पर संपर्क करियै मदाद हासल करन।

<><><><><><>

Elderly Helpline

समाज कल्याण विभाग जम्मू-कश्मीर केन्द्र शासित प्रदेश च बुजुर्ग लेई 'एल्डरलाईन हेल्पलाईन' परतियै शुरु करी दित्ती ऐ। एह हेल्पलाईन बड्डलै 8 बजे कोला लेइयै रातीं 8 बजे तगर उपलब्ध होग ते एह्दे राहें वरिष्ठ नागरिकें गी जरूरी सहायता उपलब्ध करोआई जा करोग। सलाह-परामर्श देने आह्ले माहिरें दी इक समर्पित टीम आसेआ इस हेल्पलाईन दे राहें लोड़मंद बुजुर्गें गी भावनात्मक सहायता, कनूनी मार्गदर्शन ते कल्याणकारी योजनाएं सरबंघी जानकारीयां दित्तिआं जाउन तांजे बुजुर्गें दी सहायता ते दिक्खभाल जकीनी बनाई जाई सकै।

<><><><><><>

Labour Camp

मकामी कर्मचारिएं गी सशक्त बनाने दी दिशा च इक महत्वपूर्ण गैह दे तौर पर रामबन दे सना ग्रां च इक जागरूकता शिविर दा आयोजन कीता गेआ। एह्दी अध्यक्षता असिस्टेंट लेबर कमीशनर अमित कुमार होरें कीती। ग्रां दे लोकें गी बक्ख-बक्ख श्रम कनूनें, वकर वैलफेयर बोर्ड तैह्त्त योजनाएं ते वजीफें बारे जानकारी दित्ती गेई। एह्दे अलावा असिस्टेंट लेबर कमीशनर हुंदे आस्सेआ लोकें गी रोजगार पैदा करने आले कार्यक्रम पीएमईजीपी, ई-श्रम ते होरनर जेह्ड़ी जानकारीयें तैह्त्त फायदें बारे लोकें गी अवगत करोआया गेआ।

<><><><><><>

Police Memorial Cricket

किश्तवाड़ पुलिस आस्सेआ पुलिस मैमोरियल क्रिकेट टूर्नामेंट 2025 दा आयोजन कीता जा'रदा ऐ। एसएसपी किश्तवाड़ हुंदे निर्देश पर इक प्रेस ब्रिफींग दा आयोजन कीता गेआ जेह्दे च शहीदें दे सर्वोच्च बलिदानें गी सम्मानत करने ते खेड्डें च युवाएं दी भागीदारी गी बढ़ावा देने च इस टूर्नामेंट दे महत्ता पर लोह पाई गेई। एह्दे च हिस्सा लैने लेई पंजीकरण शुरू होई गेदा ऐ ते इच्छुक क्रिकेट क्लब एह्दे लेई जे मती जानकारी हासल करन। चांह्दे न ते इनें फोन नंबर पर संपर्क करी सकदे न। एह् फोन नंबर न:- 9622057225 ते 9906154100

<><><><><><>